

慧日佛學班第 7 期（《大智度論》）

《大智度論》卷 47

〈釋摩訶衍品第十八之餘〉¹

（大正 25，396b21~402c11）

釋厚觀（2009.12.5）

【經】

（一）六度是摩訶衍（見卷 46）

（二）十八空、四空是摩訶衍（見卷 46）

（三）百八三昧是摩訶衍²

1、標列

復次，須菩提！菩薩摩訶薩摩訶衍，所謂名：⁽¹⁾ 首楞嚴三昧，⁽²⁾ 寶印三昧，⁽³⁾ 師子遊戲三昧，⁽⁴⁾ 妙月三昧，⁽⁵⁾ 月幢相三昧，⁽⁶⁾ 出諸法三昧，⁽⁷⁾ 觀頂三昧，⁽⁸⁾ 畢法性三昧，⁽⁹⁾ 畢幢相三昧，⁽¹⁰⁾ 金剛三昧，⁽¹¹⁾ 入法（396c）印三昧，⁽¹²⁾ 三昧王安立三昧，⁽¹³⁾ 放光三昧，⁽¹⁴⁾ 力進三昧，⁽¹⁵⁾ 高出三昧，⁽¹⁶⁾ 必入辯才三昧，⁽¹⁷⁾ 釋名字三昧，⁽¹⁸⁾ 觀方三昧，⁽¹⁹⁾ 陀羅尼印三昧，⁽²⁰⁾ 無誑三昧，⁽²¹⁾ 攝諸法海三昧，⁽²²⁾ 遍覆虛空三昧，⁽²³⁾ 金剛輪三昧，⁽²⁴⁾ 斷寶³三昧，⁽²⁵⁾ 能照三昧，⁽²⁶⁾ 不求三昧，⁽²⁷⁾ 無住三昧，⁽²⁸⁾ 無心三昧，⁽²⁹⁾ 淨燈三昧，⁽³⁰⁾ 無邊明三昧，⁽³¹⁾ 能作明三昧，⁽³²⁾ 普照明三昧，⁽³³⁾ 堅淨諸三昧三昧，⁽³⁴⁾ 無垢明三昧，⁽³⁵⁾ 歡喜三昧，⁽³⁶⁾ 電光三昧，⁽³⁷⁾ 無盡三昧，⁽³⁸⁾ 威德三昧，⁽³⁹⁾ 離盡三昧，⁽⁴⁰⁾ 不動三昧，⁽⁴¹⁾ 不退三昧，⁽⁴²⁾ 日燈三昧，⁽⁴³⁾ 月淨三昧，⁽⁴⁴⁾ 淨明三昧，⁽⁴⁵⁾ 能作明三昧，⁽⁴⁶⁾ 作行三昧，⁽⁴⁷⁾ 知相三昧，⁽⁴⁸⁾ 如金剛三昧，⁽⁴⁹⁾ 心住三昧，⁽⁵⁰⁾ 普明三昧，⁽⁵¹⁾ 安立三昧，⁽⁵²⁾ 寶聚三昧，⁽⁵³⁾ 妙法印三昧，⁽⁵⁴⁾ 法等三昧，⁽⁵⁵⁾ 斷喜三昧，⁽⁵⁶⁾ 到法頂三昧，⁽⁵⁷⁾ 能散三昧，⁽⁵⁸⁾ 分別諸法句三昧，⁽⁵⁹⁾ 字等相三昧，⁽⁶⁰⁾ 離字三昧，⁽⁶¹⁾ 斷緣三昧，⁽⁶²⁾ 不壞三昧，⁽⁶³⁾ 無種相三昧，⁽⁶⁴⁾ 無處行三昧，⁽⁶⁵⁾ 離矇昧三昧，⁽⁶⁶⁾ 無去三昧，⁽⁶⁷⁾ 不變異三昧，⁽⁶⁸⁾ 度緣三昧，⁽⁶⁹⁾ 集諸功德三昧，⁽⁷⁰⁾ 住無心三昧，⁽⁷¹⁾ 妙淨⁴華三昧，⁽⁷²⁾ 覺意三昧，⁽⁷³⁾ 無量辯三昧，⁽⁷⁴⁾ 無等等三昧，⁽⁷⁵⁾ 度諸法三昧，⁽⁷⁶⁾ 分別諸法三昧，⁽⁷⁷⁾ 散疑三昧，⁽⁷⁸⁾ 無住處三昧，⁽⁷⁹⁾ 一莊嚴三昧，⁽⁸⁰⁾ 生行三昧，⁽⁸¹⁾ 一行三昧，⁽⁸²⁾ 不一行三昧，⁽⁸³⁾ 妙行三昧，⁽⁸⁴⁾ 達一切有底散三昧，⁽⁸⁵⁾ 入名語三昧，⁽⁸⁶⁾ 離音聲字語三昧，⁽⁸⁷⁾ 然炬三昧，⁽⁸⁸⁾ 淨相三昧，⁽⁸⁹⁾ 破相三昧，⁽⁹⁰⁾ 一切種妙足三昧，⁽⁹¹⁾ 不喜苦樂三昧，⁽⁹²⁾ 無盡相三昧，⁽⁹³⁾ 陀羅尼三昧⁵，⁽⁹⁴⁾ 攝諸邪正相三昧，⁽⁹⁵⁾ 滅憎愛三昧，⁽⁹⁶⁾ 逆

¹（釋摩……餘）十字＝（十八品中百八三昧）八字【宮】。（大正 25，396d，n.11）

²參見《摩訶般若波羅蜜經》卷 5〈18 問乘品〉（大正 8，251a8-253b16），《大般若波羅蜜多經》（第二分）卷 414〈16 三摩地品〉（大正 7，74c1-77c6），《大般若波羅蜜多經》（第三分）卷 488〈3 善現品〉（大正 7，481a14-483c5），《放光般若經》卷 4〈19 問摩訶衍品〉（大正 8，23b15-24c24），《光讚經》卷 6〈16 三昧品〉（大正 8，190a18-193a10）。

³斷寶＝寶斷【明】下同。（大正 25，396d，n.16）

⁴妙淨＝淨妙【宋】【元】【明】【宮】。（大正 25，396d，n.19）

⁵（多）＋陀羅尼【宋】【元】【明】【宮】【聖】【石】。（大正 25，396d，n.22）

順三昧，⁽⁹⁷⁾淨光三昧，⁽⁹⁸⁾堅固三昧，⁽⁹⁹⁾滿月淨光三昧，⁽¹⁰⁰⁾大莊嚴三昧，⁽¹⁰¹⁾能照一切世三昧⁶，⁽¹⁰²⁾三昧等三昧，⁽¹⁰³⁾攝一切有諍無諍三昧，⁽¹⁰⁴⁾不樂一切住處三昧，⁽¹⁰⁵⁾如住定三昧，⁽¹⁰⁶⁾壞身衰三昧，⁽¹⁰⁷⁾壞語如虛空三昧，⁽¹⁰⁸⁾離著虛空不染三昧。

2、釋義

- (1) 云何名首楞嚴 (397a) 三昧？知諸三昧行處，是名首楞嚴三昧。
- (2) 云何名寶印三昧？住是三昧，能印諸三昧，是名寶印三昧。
- (3) 云何名師子遊戲三昧？住是三昧，能遊戲諸三昧中如師子，是名師子遊戲三昧。
- (4) 云何名妙月三昧？住是三昧，能照諸三昧如淨月，是名妙月三昧。
- (5) 云何名月幢相三昧？住是三昧，能持諸三昧相，是名月幢相三昧。⁷
- (6) 云何名出諸法三昧？住是三昧，能出生諸三昧，是名出諸法三昧。
- (7) 云何名觀頂三昧？住是三昧，能觀諸三昧頂，是名觀頂三昧。
- (8) 云何名畢法性三昧？住是三昧，決定知法性，是名畢法性三昧。⁸
- (9) 云何名畢幢相三昧？住是三昧，能持諸三昧幢，是名畢幢相三昧。
- (10) 云何名金剛三昧？住是三昧，能破諸三昧，是名金剛三昧。⁹
- (11) 云何名入法印三昧？住是三昧，入諸法印，是名入法印三昧。
- (12) 云何名三昧王安立三昧？住是三昧，一切諸三昧中安立住如王，是名三昧王安立三昧。
- (13) 云何名放光三昧？住是三昧，能放光照諸三昧，是名放光三昧。
- (14) 云何名力進三昧？住是三昧，於諸三昧能作力勢，是名力進三昧。¹⁰
- (15) 云何名高出三昧？住是三昧，能增長諸三昧，是名高出三昧。
- (16) 云何名必入辯才三昧？住是三昧，能辯說諸三昧，是名必入辯才三昧。
- (17) 云何名釋名字三昧？住是三昧，能釋諸三昧名字，是名釋名字三昧。
- (18) 云何名觀方三昧？住是三昧，能觀諸三昧方，是名觀方三昧。
- (19) 云何名陀羅尼印三昧？住是三昧，持諸三昧印，是名陀羅尼印三昧。
- (20) 云何名無誑三昧？住是三昧，於諸三昧不欺誑，是名無誑三 (397b) 昧。¹¹

⁶ 世+ (間)【石】。(大正 25, 396d, n.23)

⁷ 參見《大般若波羅蜜多經》卷 414〈16 三摩地品〉：「云何名為月幢相三摩地？謂若住此三摩地時，普能住持諸定勝相，是故名為月幢相三摩地。」(大正 7, 74c10-12)

⁸ 參見《大般若波羅蜜多經》卷 414〈16 三摩地品〉：「云何名為法界決定三摩地？謂若住此三摩地時，能於法界決定照了，是故名為法界決定三摩地。」(大正 7, 74c16-18)

⁹ 參見《大般若波羅蜜多經》卷 414〈16 三摩地品〉：「云何名為金剛喻三摩地？謂若住此三摩地時，能摧諸定，非彼所伏，是故名為金剛喻三摩地。」(大正 7, 74c20-22)

¹⁰ 參見《大般若波羅蜜多經》卷 414〈16 三摩地品〉：「云何名為精進力三摩地？謂若住此三摩地時，能發諸定精進勢力，是故名為精進力三摩地。」(大正 7, 75a3-5)

¹¹ (1)《放光般若經》卷 4〈19 問摩訶衍品〉：「復有不忘三昧，住是三昧者不忘諸三昧。」(大正 8, 23c10-11)

(2)《光讚經》卷 6〈16 三昧品〉：「彼何謂無所奪三昧？住是定意時，尋即不忘一切定意，是謂無所奪三昧。」(大正 8, 191a13-15)

(3)《大般若波羅蜜多經》卷 414〈16 三摩地品〉：「云何名為無忘失三摩地？謂若住此三摩

- (21) 云何名攝諸法海三昧？住是三昧，能攝諸三昧如大海水，是名攝諸法海三昧。¹²
- (22) 云何名遍覆虛空三昧？住是三昧，遍覆諸三昧如虛空，是名遍覆虛空三昧。
- (23) 云何名金剛輪三昧？住是三昧，能持諸三昧分，是名金剛輪三昧。¹³
- (24) 云何名斷寶三昧？住是三昧，斷諸三昧煩惱垢，是名斷寶三昧。¹⁴
- (25) 云何名能照三昧？住是三昧，能以光明顯照諸三昧，是名能照三昧。
- (26) 云何名不求三昧？住是三昧，無法可求，是名不求三昧。
- (27) 云何名無住三昧？住是三昧，一切三昧中不見法住，是名無住三昧。¹⁵
- (28) 云何名無心三昧？住是三昧，心心數法不行，是名無心三昧。¹⁶
- (29) 云何名淨燈三昧？住是三昧，於諸三昧中作明如燈，是名淨燈三昧。
- (30) 云何名無邊明三昧？住是三昧，與諸三昧作無邊明，是名無邊明三昧。
- (31) 云何名能作明三昧？住是三昧，即時能為諸三昧作明，是名能作明三昧。¹⁷
- (32) 云何名普照明三昧？住是三昧，即能照諸三昧門，是名普照明三昧。
- (33) 云何名堅淨諸三昧三昧？住是三昧，能堅淨諸三昧相，是名堅淨諸三昧三昧。
- (34) 云何名無垢明三昧？住是三昧，能除諸三昧垢，亦能照一切三昧，是名無垢明三昧。
- (35) 云何名歡喜三昧？住是三昧，能受諸三昧喜，是名歡喜三昧。
- (36) 云何名電光三昧？住是三昧，照諸三昧如電光，是名電光三昧。
- (37) 云何名無盡三昧？住是三昧，於諸三昧不見盡，是名無盡三昧。¹⁸
- (38) 云何名威德三昧？住是三昧，於諸三昧威德照然，是名威德三昧。
- (39) 云何名離盡三昧？住是三昧，不見諸三昧盡，是名離盡三昧。¹⁹
- (40) 云何(397c)名不動三昧？住是三昧，令諸三昧不動不戲，是名不動三昧。²⁰
- (41) 云何名不退三昧？住是三昧，能不見諸三昧退，是名不退三昧。

地時，於諸定相皆無忘失，是故名為無忘失三摩地。」(大正 7, 75a16-18)

¹² 參見《大般若波羅蜜多經》卷 414〈16 三摩地品〉：「云何名為諸法等趣海印三摩地？謂若住此三摩地時，令諸勝定等皆趣入如大海印攝受眾流，是故名為諸法等趣海印三摩地。」(大正 7, 75a18-21)

¹³ 參見《大般若波羅蜜多經》卷 414〈16 三摩地品〉：「云何名為金剛輪三摩地？謂若住此三摩地時，普能任持一切勝定令不散壞，如金剛輪，是故名為金剛輪三摩地。」(大正 7, 75a24-26)

¹⁴ 參見《大般若波羅蜜多經》卷 414〈16 三摩地品〉：「云何名為離塵三摩地？謂若住此三摩地時，能滅一切煩惱纏垢，是故名為離塵三摩地。」(大正 7, 75a26-28)

¹⁵ 參見《大般若波羅蜜多經》卷 414〈16 三摩地品〉：「云何名為無相住三摩地？謂若住此三摩地時，不見諸定中有少法可住，是故名為無相住三摩地。」(大正 7, 75b3-6)

¹⁶ 參見《大般若波羅蜜多經》卷 414〈16 三摩地品〉：「云何名為不思惟三摩地？謂若住此三摩地時，所有下劣心、心所法悉皆不轉，是故名為不思惟三摩地。」(大正 7, 75b6-8)

¹⁷ 參見《大般若波羅蜜多經》卷 414〈16 三摩地品〉：「云何名為發光三摩地？謂若住此等持無間，能發一切勝定光明，是故名為發光三摩地。」(大正 7, 75b12-14)

¹⁸ 參見《大般若波羅蜜多經》卷 414〈16 三摩地品〉：「云何名為無盡三摩地？謂若住此三摩地時，引諸等持功德無盡而不見彼盡不盡相，是故名為無盡三摩地。」(大正 7, 75b25-27)

¹⁹ 參見《大般若波羅蜜多經》卷 414〈16 三摩地品〉：「云何名為離盡三摩地？謂若住此三摩地時，見諸等持一切無盡而不見有盡不盡相，是故名為離盡三摩地。」(大正 7, 75b29-c3)

²⁰ 參見《大般若波羅蜜多經》卷 414〈16 三摩地品〉：「云何名為無動三摩地？謂若住此三摩地時，令諸等持無動無掉亦無戲論，是故名為無動三摩地。」(大正 7, 75c3-5)

- (42) 云何名日燈三昧？住是三昧，放光照諸三昧門，是名日燈三昧。
- (43) 云何名月淨三昧？住是三昧，能除諸三昧闇，是名月淨三昧。
- (44) 云何名淨明三昧？住是三昧，於諸三昧得四無礙智，是名淨明三昧。
- (45) 云何名能作明三昧？住是三昧，於諸三昧門能作明，是名能作明三昧。²¹
- (46) 云何名作行三昧？住是三昧，能令諸三昧各有所作，是名作行三昧。²²
- (47) 云何名知相三昧？住是三昧，見諸三昧知相，是名知相三昧。
- (48) 云何名如金剛三昧？住是三昧，能貫達諸法亦不見達，是名如金剛三昧。²³
- (49) 云何名心住三昧？住是三昧，心不動不轉不惱亦不念有是心，是名心住三昧。
- (50) 云何名普明三昧？住是三昧，普見諸三昧明，是名普明三昧。
- (51) 云何名安立三昧？住是三昧，於諸三昧安立不動，是名安立三昧。
- (52) 云何名寶聚三昧？住是三昧，普見諸三昧如見寶聚，是名寶聚三昧。
- (53) 云何名妙法印三昧？住是三昧，能印諸三昧，以無印印故，是名妙法印三昧。
- (54) 云何名法等三昧？住是三昧，觀諸法等、無法不等，是名法等三昧。²⁴
- (55) 云何名斷喜三昧？住是三昧，斷一切法中喜，是名斷喜三昧。
- (56) 云何名到法頂三昧？住是三昧，滅諸法闇亦在諸三昧上，是名到法頂三昧。
- (57) 云何名能散三昧？住是三昧中，能破散諸法，是名能散三昧。
- (58) 云何名分別諸法句三昧？住是三昧，能²⁵分別諸三昧諸法句，是名分別諸法句三昧。
- (59) 云何名字等(398a)相三昧？住是三昧，得諸三昧字等，是名字等相三昧。
- (60) 云何名離字三昧？住是三昧，諸三昧中乃至不見一字，是名離字三昧。
- (61) 云何名斷緣三昧？住是三昧，斷諸三昧緣，是名斷緣三昧。²⁶
- (62) 云何名不壞三昧？住是三昧，不得諸法變異，是名不壞三昧。²⁷
- (63) 云何名無種相三昧？住是三昧，不見諸法種種，是名無種相三昧。²⁸
- (64) 云何名無處行三昧？住是三昧，不見諸三昧處，是名無處行三昧。
- (65) 云何名離矇昧三昧？住是三昧，離諸三昧微闇，是名離矇²⁹昧三昧。

²¹ 參見《大般若波羅蜜多經》卷 414〈16 三摩地品〉：「云何名為發明三摩地？謂若住此三摩地時，令諸定門發明普照，是故名為發明三摩地。」(大正 7，75c13-15)

²² 參見《大般若波羅蜜多經》卷 414〈16 三摩地品〉：「云何名為作所應作三摩地？謂若住此三摩地時，辦諸等持所應作事，又令諸定所作事成，是故名為作所應作三摩地。」(大正 7，75c15-18)

²³ 參見《大般若波羅蜜多經》卷 414〈16 三摩地品〉：「云何名為金剛鬘三摩地？謂若住此三摩地時，雖能通達一切法而不見有通達相，是故名為金剛鬘三摩地。」(大正 7，75c20-22)

²⁴ 參見《大般若波羅蜜多經》卷 414〈16 三摩地品〉：「云何名為一切法平等性三摩地？謂若住此三摩地時，不見有法離平等性，是故名為一切法平等性三摩地。」(大正 7，76a4-6)

²⁵ [能]—【宋】【元】【明】【宮】【聖】。(大正 25，397d，n.10)

²⁶ 參見《大般若波羅蜜多經》卷 414〈16 三摩地品〉：「云何名為斷所緣三摩地？謂若住此三摩地時，絕諸等持所緣境相，是故名為斷所緣三摩地。」(大正 7，76a20-22)

²⁷ 參見《大般若波羅蜜多經》卷 414〈16 三摩地品〉：「云何名為無變異三摩地？謂若住此三摩地時，不得諸法變異之相，是故名為無變異三摩地。」(大正 7，76a22-24)

²⁸ 參見《大般若波羅蜜多經》卷 414〈16 三摩地品〉：「云何名為無品類三摩地？謂若住此三摩地時，不見諸法品類別相，是故名為無品類三摩地。」(大正 7，76a24-26)

- (66) 云何名無去三昧？住是三昧，不見一切三昧去相，是名無去三昧。
- (67) 云何名不變異三昧？住是三昧，不見諸三昧變異相，是名不變異三昧。
- (68) 云何名度緣三昧？住是三昧，度一切三昧緣境界，是名度緣三昧。³⁰
- (69) 云何名集諸功德三昧？住是三昧，集諸三昧功德，是名集諸功德三昧。
- (70) 云何名住無心三昧？住是三昧，於諸三昧心不入，是名住無心三昧。
- (71) 云何名淨妙華三昧？住是三昧，令諸三昧得淨妙如華，是名淨妙華三昧。
- (72) 云何名覺意三昧？住是三昧，諸三昧中得七覺分，是名覺意三昧。
- (73) 云何名無量辯三昧？住是三昧，於諸法中得無量辯，是名無量辯三昧。
- (74) 云何名無等等三昧？住是三昧，諸三昧中得無等等相，是名無等等三昧。
- (75) 云何名度諸法三昧？住是三昧，度一切三昧³¹，是名度諸法三昧。³²
- (76) 云何名分別諸法三昧？住是三昧，諸三昧及諸法分別見，是名分別諸法三昧。
- (77) 云何名散疑三昧？住是三昧，得散諸法疑，是名散疑三昧。
- (78) 云何名無住處三昧？住是三昧，(398b) 不見諸法住處，是名無住處三昧。
- (79) 云何名一莊嚴三昧？住是三昧，終不見諸法二相，是名一莊嚴三昧。³³
- (80) 云何名生行三昧？住是三昧，不見諸行生，是名生行三昧。³⁴
- (81) 云何名一行三昧？住是三昧，不見諸三昧此岸、彼岸，是名一行三昧。³⁵
- (82) 云何名不一行三昧？住是三昧，不見諸三昧一相，是名不一行三昧。³⁶
- (83) 云何名妙行三昧？住是三昧，不見諸三昧二相，是名妙行三昧。³⁷
- (84) 云何名達一切有底散三昧？住是三昧，入一切有、一切三昧，智慧通達亦無所

²⁹ 矇=矇【宋】【元】【明】【聖】【石】。(大正 25, 398d, n.1)

³⁰ 參見《大般若波羅蜜多經》卷 414〈16 三摩地品〉：「云何名為度境界三摩地？謂若住此三摩地時，超諸等持所緣境界，是故名為度境界三摩地。」(大正 7, 76b6-8)

³¹ 三昧=三界【宋】，=三昧界【元】【明】【石】。(大正 25, 398d, n.5)

³² 參見《大般若波羅蜜多經》卷 414〈16 三摩地品〉：「云何名為超一切法三摩地？謂若住此三摩地時，普能超度三界諸法，是故名為超一切法三摩地。」(大正 7, 76b27-29)

³³ 參見《大般若波羅蜜多經》卷 414〈16 三摩地品〉：「云何名為一相莊嚴三摩地？謂若住此三摩地時，不見諸法二相可取，是故名為一相莊嚴三摩地。」(大正 7, 76c8-10)

³⁴ 參見《大般若波羅蜜多經》卷 414〈16 三摩地品〉：「云何名為引發行相三摩地？謂若住此三摩地時，於諸等持及一切法雖能引發種種行相，而都不見能引發者，是故名為引發行相三摩地。」(大正 7, 76c10-13)

³⁵ (1) 參見《大般若波羅蜜多經》卷 414〈16 三摩地品〉：「云何名為一行相三摩地？謂若住此三摩地時，見諸等持無二行相，是故名為一行相三摩地。」(大正 7, 76c13-15)

(2) 參見《文殊師利所說摩訶般若波羅蜜經》卷 2：「文殊師利言：『世尊！云何名一行三昧？』佛言：『法界一相，繫緣法界，是名一行三昧。若善男子、善女人欲入一行三昧，當先聞般若波羅蜜，如說修學，然後能入一行三昧——如法界緣不退、不壞、不思議、無礙、無相。善男子、善女人欲入一行三昧，應處空閑，捨諸亂意，不取相貌，繫心一佛，專稱名字，隨佛方所，端身正向，能於一佛念念相續，即是念中能見過去、未來、現在諸佛。』」(大正 8, 731a25-b5)

³⁶ 參見《大般若波羅蜜多經》卷 414〈16 三摩地品〉：「云何名為離行相三摩地？謂若住此三摩地時，見諸等持都無行相，是故名為離行相三摩地。」(大正 7, 76c15-18)

³⁷ 參見《大般若波羅蜜多經》卷 414〈16 三摩地品〉：「云何名為妙行相三摩地？謂若住此三摩地時，令諸等持起妙行相，是故名為妙行相三摩地。」(大正 7, 76c18-20)

- 達，是名達一切有底散三昧。³⁸
- (85) 云何名入名語三昧？住是三昧，入一切三昧名語，是名入名語三昧。
- (86) 云何名離音聲字語三昧？住是三昧，不見諸三昧音聲字語，是名離音聲字語三昧。
- (87) 云何名然炬三昧？住是三昧，威德照明如炬，是名然炬三昧。
- (88) 云何名淨相三昧？住是三昧，淨諸三昧相，是名淨相三昧。
- (89) 云何名破相三昧？住是三昧，不見諸三昧相，是名破相三昧。³⁹
- (90) 云何名一切種妙足三昧？住是三昧，一切諸三昧種皆具足，是名一切種妙足三昧。
- (91) 云何名不喜苦樂三昧？住是三昧，不見諸三昧苦樂，是名不喜苦樂三昧。
- (92) 云何名無盡相三昧？住是三昧，不見諸三昧盡，是名無盡相三昧。⁴⁰
- (93) 云何名陀羅尼⁴¹三昧？住是三昧，能持諸三昧，是名陀羅尼三昧。
- (94) 云何名攝諸邪正相三昧？住是三昧，於諸三昧不見邪正相，是名攝諸邪正相三昧。⁴²
- (95) 云何名滅憎愛三昧？住是三昧，不見諸三昧憎愛，是名滅憎愛三昧。
- (96) 云何名逆順三昧？住是三昧，不見諸法、諸三昧逆順，是(398c)名逆順三昧。
- (97) 云何名淨光三昧？住是三昧，不得諸三昧明垢，是名淨光三昧。⁴³
- (98) 云何名堅固三昧？住是三昧，不得諸三昧不堅固，是名堅固三昧。
- (99) 云何名滿月淨光三昧？住是三昧，諸三昧滿足如月十五日，是名滿月淨光三昧。
- (100) 云何名大莊嚴三昧？住是三昧，大莊嚴成就諸三昧，是名大莊嚴三昧。
- (101) 云何名能照一切世三昧？住是三昧，諸三昧及一切法能照，是名能照一切世三昧。
- (102) 云何名三昧等三昧？住是三昧，於諸三昧不得⁴⁴定亂相，是名三昧等三昧。
- (103) 云何名攝一切有諍無諍三昧？住是三昧，能使諸三昧不分別有諍無諍，是名攝一切有諍無諍三昧。
- (104) 云何名不樂一切住處三昧？住是三昧，不見諸三昧依處，是名不樂一切住處三昧。

³⁸ 參見《大般若波羅蜜多經》卷 414〈16 三摩地品〉：「云何名為達諸有底散壞三摩地？謂若住此三摩地時，於諸等持及一切法，得通達智如實悟入；既得入已，於諸有法通達散壞令無所遺，是故名為達諸有底散壞三摩地。」(大正 7，76c20-24)

³⁹ 參見《大般若波羅蜜多經》卷 414〈16 三摩地品〉：「云何名為無標幟三摩地？謂若住此三摩地時，於諸等持不見標幟，是故名為無標幟三摩地。」(大正 7，77a5-7)

⁴⁰ 參見《大般若波羅蜜多經》卷 414〈16 三摩地品〉：「云何名為無盡行相三摩地？謂若住此三摩地時，不見諸定行相有盡，是故名為無盡行相三摩地。」(大正 7，77a12-15)

⁴¹ (多) + 陀羅尼【元】【明】。(大正 25，3981d，n.10)

⁴² 參見《大般若波羅蜜多經》卷 414〈16 三摩地品〉：「云何名為攝伏一切正性邪性三摩地？謂若住此三摩地時，於諸等持正性邪性攝伏諸見皆令不起，是故名為攝伏一切正性邪性三摩地。」(大正 7，77a17-20)

⁴³ 參見《大般若波羅蜜多經》卷 414〈16 三摩地品〉：「云何名為無垢明三摩地？謂若住此三摩地時，於諸等持都不見有明相、垢相，是故名為無垢明三摩地。」(大正 7，77a26-28)

⁴⁴ 得=見【元】【明】【石】。(大正 25，398d，n.12)

- (105) 云何名如住定三昧？住是三昧，不過諸三昧如相，是名如住定三昧。⁴⁵
- (106) 云何名壞身衰三昧？住是三昧，不得身相，是名壞身衰三昧。⁴⁶
- (107) 云何名壞語如虛空三昧？住是三昧，不見諸三昧語業如虛空，是名壞語如虛空三昧。
- (108) 云何名離著虛空不染三昧？住是三昧，見諸法如虛空無礙亦不染，是⁴⁷名離著虛空不染三昧。

須菩提！是名菩薩摩訶薩摩訶衍。」

【論】釋曰：

（三）百八三昧是摩訶衍

1、釋義⁴⁸

上以十八空釋般若波羅蜜，今以百八三昧釋禪波羅蜜。

百八三昧，佛自說其義，是時人利根故，皆得信解；今則不然，論者重釋其義，令得易解。

（1）首楞嚴三昧

「首楞嚴三昧」者（秦言「健相」），分別知諸三昧行相多少深淺，如大將知諸兵力多少。⁴⁹

復次，菩薩得是三昧，諸煩惱魔及魔人無能壞者；(399a)譬如轉輪聖王主兵寶將，所往至處無不降伏。

（2）寶印三昧

「寶印三昧」者，能印諸三昧。

⁴⁵ 參見《大般若波羅蜜多經》卷 414〈16 三摩地品〉：「云何名為決定安住真如三摩地？謂若住此三摩地時，於諸等持及一切法，常不棄捨真如實相，是故名為決定安住真如三摩地。」（大正 7，77b18-21）

⁴⁶ 參見《大般若波羅蜜多經》卷 414〈16 三摩地品〉：「云何名為離身穢惡三摩地？謂若住此三摩地時，令諸等持破壞身見，是故名為離身穢惡三摩地。」（大正 7，77b21-23）

⁴⁷ 是+（三昧）【元】【明】，（是三昧）+是【石】。（大正 25，398d，n.13）

⁴⁸ 百八三昧：釋義。（導師《大智度論筆記》〔E005〕p.298）

⁴⁹（1）唐·慧琳撰《一切經音義》卷 26：「首楞嚴三昧（此云勇健定也，此經中自釋云：首楞嚴者，於一切事究竟堅固也）」（大正 54，480a1）

（2）《佛說首楞嚴三昧經》卷上：「爾時，佛告堅意菩薩：『首楞嚴三昧，非初地、二地、三地、四地、五地、六地、七地、八地、九地菩薩之所能得，唯有住在十地菩薩乃能得是首楞嚴三昧。』」（大正 15，631a18-21）

《佛說首楞嚴三昧經》卷下：「爾時名意菩薩白佛言：『世尊，我謂菩薩若能通達首楞嚴三昧，當知通達一切道行，於聲聞乘、辟支佛乘及佛大乘皆悉通達。』佛言：『如是！如是！如汝所說。菩薩若能通達首楞嚴三昧，則能通達一切道行。』」（大正 15，643c25-29）

（3）《大智度論》卷 30：「菩薩住於十地，入首楞嚴三昧，於三千大千世界，或時現初發意，行六波羅蜜；或現阿鞞跋致；或現一生補處，於兜率天上，為諸天說法；或從兜率天上來，下生淨飯王宮；或現出家成佛；或現大眾中轉法輪，度無量眾生；或現入涅槃，起七寶塔，遍諸國土，令眾生供養舍利；或時法都滅盡。菩薩利益如是，何況於佛！」（大正 25，278a10-16）

於諸寶中，法寶是實寶，今世、後世乃至涅槃，能為利益。如《經》中說：「佛語比丘：為汝說法，所說法者⁵⁰，所謂法印。」⁵¹法印即是寶印，寶印即是三⁵²解脫門。

復次，有人言：三法印名為寶印三昧；一切法無我，一切作法無常，寂滅涅槃——是三法印，⁵³一切人天無能如法壞者。入是三昧，能三種觀諸法，是名寶印。

復次，般若波羅蜜是寶，是相應三昧名印——是名寶印。

(3) 師子遊戲三昧

「師子遊戲三昧」者，菩薩得是三昧，於一切三昧中，出入、遲速皆得自在。譬如眾獸戲時，若見師子，率皆⁵⁴怖懼⁵⁵；師子戲時，自在無所畏難。

復次，師子戲時，於諸群獸，強者則殺，伏者則放；菩薩亦如是，得是三昧，於諸外道，強者破之，信者度之。

復次，「師子遊戲」者，如初品中說。⁵⁶菩薩入是三昧中，地為六反震動；令一切十方世界⁵⁷地獄湯冷、盲者得視、聾者得聽等。

(4) 妙月三昧

「妙月三昧」者，如月滿清淨，無諸翳障⁵⁸，能除夜闇；此三昧亦如是，菩薩入是三昧，能除諸法邪見、無明闇蔽等。

(5) 月幢相三昧

「月幢相三昧⁵⁹」者，如大軍將幢⁶⁰以⁶¹寶作月像，見此幢相，人皆隨從；菩薩

⁵⁰ [所說法者] — 【宋】【宮】【聖】。(大正 25, 399d, n.4)

⁵¹ 參見《佛說法印經》(大正 2, 500b21-c27)。

⁵² [三] — 【宋】【元】【明】【宮】。(大正 25, 399d, n.6)

⁵³ 三法印。(導師《大智度論筆記》 E005) p.295)

⁵⁴ 率皆：猶言都是。(《漢語大詞典(二)》，p.381)

⁵⁵ 怖懼(尸乞丿)：恐懼。(《漢語大詞典(七)》，p.474)

⁵⁶ 《正觀》第 6 期，p.127：

(1) 參見《摩訶般若波羅蜜經》卷 1〈序品〉：「爾時，世尊故在師子座，入師子遊戲三昧，以神通力感動三千大千世界，六種震動——東涌西沒，西涌東沒；南涌北沒，北涌南沒；邊涌中沒，中涌邊沒。」(大正 8, 217c5-8)

(2) 參見《大智度論》卷 8：「問曰：此三昧何以名師子遊戲？答曰：譬如師子搏鹿，自在戲樂；佛亦如是，入此三昧，能種種迴轉此地，令六反震動。復次，師子遊戲，譬如師子戲日，諸獸安隱；佛亦如是，入是三昧時，震動三千大千世界，能令三惡眾生一時得息，皆得安隱。復次，佛名人師子，師子遊戲三昧是佛戲三昧也。入此三昧時，令此大地六種震動，一切地獄、惡道眾生皆蒙解脫、得生天上，是名為戲。問曰：佛何以故入此三昧？答曰：欲動三千大千世界出三惡道眾生著二道中故。復次，上三種變化，出自佛身，人或信心不深；今動大地，欲令眾生知佛神力無量，能令外物皆動，信淨心喜，皆得離苦。」(大正 25, 116c9-23)

⁵⁷ 世界=國土【石】。(大正 25, 399d, n.11)

⁵⁸ 翳障：障蔽。(《漢語大詞典(九)》，p.677)

⁵⁹ [三昧] — 【宋】【元】【明】【宮】【聖】【石】。(大正 25, 399d, n.13)

⁶⁰ 幢(彳义尤丿)：一種旌旗。垂筒形，飾有羽毛、錦繡。古代常在軍事指揮、儀仗行列、舞蹈表演中使用。(《漢語大詞典(三)》，p.761)

入是三昧中，諸法通達無礙，皆悉隨從。

(6) 出諸法三昧

「出諸法三昧」者，菩薩得是三昧，令諸三昧增長；譬如時雨，林木茂盛。

(7) 觀頂三昧

「觀頂三昧」者，入是三昧中，能遍見諸三昧；如住山頂，悉見眾物。

(8) 畢法性三昧

「畢法性三昧」者，法性無量無二，難可執持；入是三昧，必能得定相。譬如虛空，無能住者；得神足力，則能處之。(399b)

(9) 畢幢相三昧

「畢幢相三昧」者，入是三昧，則於諸三昧最為尊長；譬如軍將得幢，表其大相。

(10) 金剛三昧

「金剛三昧」者，⁶²譬如金剛，無物不陷⁶³。此三昧亦如是，於諸法無不通達，令諸三昧各得其用；如車璩、瑪瑙⁶⁴、琉璃，唯金剛能穿。

(11) 入法印三昧

「入法印三昧」者，如人入安隱國，有印得入，無印不得入；菩薩得是三昧，能入諸法實相中——所謂諸法畢竟空。⁶⁵

(12) 三昧王安立三昧

「三昧王安立三昧」者，譬如大王安住正殿，召諸群臣，皆悉從命。菩薩入三昧王，放大光明，請召十方，無不悉集；又遣化佛，遍至十方。

「安立」者，譬如國王安處正殿，身心坦然，無所畏懼。

(13) 放光三昧

「放光三昧」者，常修火一切入故，生神通力，隨意放種種色光，隨眾生所樂——若熱、若冷、若不熱不冷。

照諸三昧⁶⁶者，光明有二種：一者、色光，二者、智慧光。住是三昧中，照諸三

⁶¹ 幢以=以幢【元】【明】【石】。(大正 25, 399d, n.14)

⁶² (1) 百八三昧中，有三種三昧含「金剛」之名：第 10 個三昧名「金剛三昧」，第 23 個三昧名「金剛輪三昧」，第 48 個三昧名「如金剛三昧」。參見《大智度論》卷 47 (大正 25, 400b17-c3)。

(2) 參見《十住毘婆沙論》卷 10：「金剛三昧者，諸佛世尊金剛三昧，是不共法，無能壞故，於一切處無有障礙故，得正遍知故，壞一切法障礙故，等貫穿故，得諸功德利益力故，諸禪定中最上故，無能壞者，是故名為金剛三昧。如金剛寶無物能破者；是三昧亦如是，無有法可以壞者，是故名金剛三昧。」(大正 26, 73b27-c4)

⁶³ 陷：刺入。《韓非子·難一》：“吾楯之堅，物莫能陷也。”(《漢語大詞典(十一)》，p.1048)

⁶⁴ 車璩瑪瑙=碑磬碼瑙【宋】【元】【明】【宮】，=車璩馬[(王*勿)/心]【聖】。(大正 25, 399d, n.17)

⁶⁵ 實相：諸法畢竟空。(導師《大智度論筆記》[E001] p.284)

⁶⁶ 參見《摩訶般若波羅蜜經》卷 5 (18 問乘品)：「云何名放光三昧？住是三昧能放光照諸三昧，是名放光三昧。」(大正 8, 251c2-4)

昧，無有邪見、無明等。

(14) 力進三昧

「力進三昧」者，先於諸法中得信等五種力，然後於諸三昧中得自在力。又雖住三昧，而常能神通變化，度諸眾生。

(15) 高出三昧

「高出三昧」者，菩薩入是三昧，所有福德智慧皆悉增長；諸三昧性，從心而出。

(16) 必入辯才三昧

「必入辯才三昧」者，四無礙⁶⁷中，辭、辯相應三昧。菩薩得是三昧，悉知眾生語言次第，及經書名字等，悉能分別無礙。

(17) 釋名字三昧

「釋名字三昧」者，諸法雖空，以名字辯諸法義，令人得解。

(18) 觀方三昧

「觀方三昧」者，於十方眾生，以慈悲憐愍，平等心觀。

復次，「方」者，循⁶⁸道理名為得方；是三昧力故，於諸三昧得其道理，出入自在無礙。

(19) 陀羅尼印三昧

「陀羅尼印三昧」者，得是三昧者，能得分別諸三昧皆有陀羅尼。

(20) 無誑三昧

「無誑三(399c)昧」者，有三昧生愛、恚、無明、邪見等；是三昧於諸三昧都無迷悶⁶⁹之事。

(21) 攝諸法海三昧

「攝諸法海三昧」者，如⁷⁰一切眾流皆歸於海，三乘法皆入是三昧中亦如是。

又諸餘三昧皆入是三昧中，如四禪、四無色中攝諸解脫、九次第等，皆入其中。

⁶⁷ (1) 《摩訶般若波羅蜜經》卷 24〈78 四攝品〉：「云何為四無礙智？一者、義無礙智，二者、法無礙智，三者、辭無礙智，四者、樂說無礙智。」(大正 8, 395b13-15)
 (2) 《大智度論》卷 25：「四無礙智者，義無礙智、法無礙智、辭無礙智、樂說無礙智。義無礙智者，用名字、言語所說事，各各諸法相……。法無礙智者，知是義名字——堅相名為地，如是等；一切名字分別中無滯，是名為法無礙智。所以者何？離名字，義不可得，知義必由於名，以是故次義有法。……是名字及義，云何令眾生得解？當以言辭分別莊嚴，能令人解，通達無滯，是名辭無礙智。說有道理，開演無盡，亦於諸禪定中得自在無滯，是名樂說無礙智。」(大正 25, 246a22-b13)
 (3) 另參見《大智度論》卷 74(大正 25, 581a14-20)、卷 85(656b22-27)、卷 88(680c17-23)、《大毘婆沙論》卷 180(大正 27, 904a8-23)、《俱舍論》卷 27(大正 29, 142a22-28)、《順正理論》卷 76(大正 29, 751a2-b8)、《顯宗論》卷 37(大正 29, 959a15-c22)。

⁶⁸ (1) 循=修【宋】【元】【明】【宮】【聖】【石】。(大正 25, 399d, n.21)
 (2) 循(ㄒㄩㄣˇ)：1、沿著，順著。2、遵守，遵從，遵循。(《漢語大詞典(三)》，p.1040)

⁶⁹ 迷悶：1、昏迷，神志不清。2、迷茫，難以辨清。(《漢語大詞典(十)》，p.820)

⁷⁰ 如=知【宋】【元】【明】【宮】【聖】。(大正 25, 399d, n.24)

(22) 遍覆虛空三昧

「遍覆虛空三昧」者，是虛空無量無邊；是三昧力，悉能遍覆虛空——或結加⁷¹趺坐、或放光明、或以音聲，充滿其中。

(23) 金剛輪三昧

「金剛輪三昧」者，如真金剛輪，所往無礙；得是三昧者，於諸法中所至無礙。復次，能分別諸三昧分界，故名「輪」；「輪⁷²」，分界也。

(24) 斷寶三昧

「斷寶三昧」者，如有寶能淨治諸寶；是三昧亦如是，能除諸三昧煩惱垢——五欲垢易遣，諸三昧垢難却。

(25) 能照三昧

「能照三昧」者，得是三昧，能以十種智慧⁷³照了諸法；譬如日出照闇浮提，事皆顯了。

(26) 不求三昧

「不求三昧」者，觀諸法如幻化，三界愛斷故，都無所求。

(27) 無住三昧

「無住三昧」者，是三昧名無住⁷⁴三昧；住是三昧中，觀諸法念念無常，無有住時。

(28) 無心三昧

「無心三昧」者，即是滅盡定，或無想定。何以故？佛自說因緣：入是三昧中，諸心心數法不行。

(29) 淨燈三昧

「淨燈三昧」者，「燈」名智慧燈，諸煩惱名垢；離是垢，慧則清淨。

(30) 無邊明三昧

「無邊明三昧」者，「無邊」名無量無數。「明」有二種：一者、度眾生故，身放

⁷¹ 加=跏【元】【明】【宮】。(大正 25, 399d, n.25)

⁷² 輪=轉【宮】。(大正 25, 399d, n.26)

⁷³ (1)《摩訶般若波羅蜜經》卷 5：「復次，須菩提！菩薩摩訶薩摩訶衍，所謂苦智、集智、滅智、道智、盡智、無生智、法智、比智、世智、他心智、如實智。……須菩提！是名菩薩摩訶薩摩訶衍，以不可得故。」(大正 8, 254c19-255a4)

案：十一智中除「如實智」是為十智。參見《大智度論》卷 23 (大正 25, 232c19-233a5)。

(2) 參見《大方廣佛華嚴經》卷 38〈33 離世間品〉：「有十種智慧光明。何等為十？所謂菩薩摩訶薩，⁽¹⁾於阿耨多羅三藐三菩提決定智慧光明；⁽²⁾見一切佛智慧光明；⁽³⁾見一切眾生死此生彼智慧光明；⁽⁴⁾開悟一切眾生，悉令正求修多羅法智慧光明；⁽⁵⁾依善知識，發菩提心，長養善根智慧光明；⁽⁶⁾示現一切諸佛智慧光明；⁽⁷⁾化一切眾生，悉令成熟安住佛地智慧光明；⁽⁸⁾分別解說不思議法智慧光明；⁽⁹⁾於一切佛神力住持善巧方便智慧光明；⁽¹⁰⁾滿足一切波羅蜜智慧光明。佛子，是為菩薩摩訶薩十種智慧光明。」(大正 9, 641c14-25)

⁷⁴ 住=作【宋】【元】【明】【宮】。(大正 25, 399d, n.29)

光明；二者、分別諸法總相、別相故，智慧光明。⁷⁵得是三昧，能照十方無邊世界及無邊諸法。

(31) 能作明三昧

「能作明三昧」者，於諸法能爲作明，如闇中然炬。

(32) 普照明三昧

「普照明三昧」者，如轉輪聖王寶珠，於軍眾外，四邊各照一由旬；菩薩得是三昧，普照諸法種種門。

(33) 堅淨諸三昧三昧

「堅淨諸三昧三昧」者，菩(400a)薩得是三昧力故，令諸三昧清淨堅牢。

(34) 無垢明三昧

「無垢明三昧」者，三解脫門相應三昧；得是三昧，離一切三昧垢——離一切無明、愛等，亦能照一切諸三昧。⁷⁶

(35) 歡喜三昧

「歡喜三昧」者，得是三昧，於諸⁷⁷法生歡喜樂。何者是？有人言：初禪是。如佛說有四修定：一者、修是三昧，得現在歡喜樂；二者、修定得知見，見眾生生死；三者、修定得智慧分別；四者、修定得漏盡。⁷⁸復次，得是三昧，生無量無邊法歡喜樂。

(36) 電光三昧

「電光三昧」者，如電暫現，行者得路；得是三昧者，無始世界來失道還得。

(37) 無盡三昧

「無盡三昧」者，得是三昧，滅諸法無常等相，即入不生不滅。

(38) 威德三昧

「威德三昧」者，菩薩得是三昧，威德莊嚴。

(39) 離盡三昧

「離盡三昧」者，菩薩得是三昧，無量阿僧祇劫善本功德必得，果報不失故。

(40) 不動三昧

「不動三昧」者——⁷⁹

⁷⁵ 二種光明：身光明，智慧光明。(導師《大智度論筆記》 B103] p.132)

⁷⁶ 實相：無垢無淨。(導師《大智度論筆記》 E001] p.284)

⁷⁷ [諸] — 【宋】【元】【明】【宮】【聖】。(大正 25, 400d, n.1)

⁷⁸ (1) 參見《集異門足論》卷 7 (大正 26, 395c8-28)，《法蘊足論》卷 8 〈14 修定品〉(大正 26, 489b1-491b7)，《品類足論》卷 14 (大正 26, 750c21-25)，《舍利弗阿毘曇論》卷 16 (大正 28, 635c20-636a14)，《俱舍論》卷 28 (大正 29, 150a16-18)，《成實論》卷 12 〈四修定品〉(大正 32, 335c20-336b5)。

(2) 參見印順法師著〈修定——修心與唯心·秘密乘〉，《華雨集(三)》，p.151- p.157。

⁷⁹ 參見《大智度論》卷 5：「常一心故，一切處心不著故。入不動三昧故，破他化自在天子魔。」

A、第四禪

有人言：第四禪是不動。⁸⁰欲界中五欲故動，初禪中覺觀故動，二禪中喜多故動，三禪中樂多⁸¹故動，四禪離出入息無諸動相故不動。

B、四無色定

有人言：四無色定是不動，離諸色故。

C、滅盡定

有人言：滅盡定是不動，離心心數法故。

D、知諸法實相，畢竟空智慧相應三昧

有人言：知諸法實相，畢竟空智慧相應三昧故不動。得是三昧已，於一切三昧、一切法，都不戲論。

(41) 不退三昧

「不退三昧」者，住是三昧，不見諸三昧退。

論者言：菩薩住是三昧，常不退轉，即是阿鞞跋致智慧相應三昧。「不退」者，不墮頂⁸²——如不墮頂義中說。⁸³

(42) 日燈三昧

(大正 25, 99b14-16)

- ⁸⁰ (1) 參見《中阿含經》卷 55〈203 晡利多經〉：「居士！彼有覺、有觀息，內靜、一心，無覺、無觀，定生喜、樂，得第二禪成就遊。彼已離喜欲，捨無求遊，正念正智而身覺樂，謂聖所說、聖所捨、念、樂住、空，得第三禪成就遊。彼樂滅、苦滅，喜、憂本已滅，不苦不樂、捨、念、清淨，得第四禪成就遊。彼已如是定心清淨，無穢無煩，柔軟善住，得不動心，修學漏盡智通作證。彼知此苦如真，知此苦集、知此苦滅、知此苦滅道如真；知此漏如真，知此漏集、知此漏滅、知此漏滅道如真。彼如是知、如是見，欲漏心解脫，有漏、無明漏心解脫，解脫已便知解脫：生已盡，梵行已立，所作已辦，不更受有，知如真。」(大正 1, 775a20-b4)
- (2) 參見印順法師著《性空學探源》(p.90-p.91)：
不動，有解說為第四禪，因為到了四禪，不為三災所動。但依《中阿含》的《大空經》與《淨不動道經》看來，**不動是合於空無邊處定的**。單修這些定，沒有無漏慧，都還談不上解脫。《淨不動道經》所說有四種定：**不動**，無所有，無相，解脫。與空義相關更切，而是更有意義的。一、**淨不動道**，經說：『若現世欲及後世欲，若現世色及後世色，彼一切是魔境界。……(如是觀「彼一切四大及四大造」，亦復如是)若現世欲及後世欲，若現世色及後世色，若現世欲想後世欲想，若現世色想後世色想，彼一切想是無常法，是苦、是滅；彼於爾時，得不動想。』這觀欲觀色皆是無常苦而超脫之，甚至連後世之欲色想也超脫了；離欲離色，與無色界的空無邊處定同。
- (3) 參見印順法師著《空之探究》(p.71)：「**四禪名為不動**。《中阿含經》的《大空經》中，內空，外空，內外空，與不動並列。內空、外空、內外空，是從根、境、識的相關中，空於五欲；不動是觀五陰無常、無我，內離我慢。不動修習成就，就是空住的成就。如著空而不得解脫，就稱四禪為不動。」

⁸¹ [多] — 【宋】【宮】。(大正 25, 400d, n.4)

⁸² 阿鞞跋致：不退即不墮頂。(導師《大智度論筆記》 E004] p.293)

⁸³ 《正觀》第 6 期, p.127:《大智度論》卷 27 (大正 25, 262b4-17), 卷 41 (361c19-362a23)。

「日燈三昧」者，⁸⁴得是三昧，能照一切諸法種種門及諸三昧；譬如日出能照一切閻浮提。

(43) 月淨三昧

「月淨三昧」者，如月從十六日漸減，至三十日都盡；凡夫人亦如是，諸善功德漸漸減盡，(400b) 墮三惡道。

如月從一日漸漸增長，至十五日光明清淨；菩薩亦如是，得是三昧，從發心來，世世漸增善根，乃至得無生法忍，授⁸⁵記，智慧清淨，利益眾生。

又⁸⁶能破諸三昧中無明。

(44) 淨明三昧

「淨明三昧」者，⁸⁷「明」名慧，垢為礙。得是三昧者，於諸法無障礙。以是故，佛於此說：「住是三昧中，得四無礙智。」

問曰：佛何以獨於此中說「四無礙智」？

答曰：於三昧中無覺觀心，所可樂說與定相違，是事為難！此三昧力故，得四無礙智。四無礙智義，如先說。⁸⁸

(45) 能作明三昧

「能作明三昧」者，「明」即是智慧；諸智慧中，般若智慧最第一——是般若相應三昧能作明。

(46) 作行三昧

「作行三昧」者，得是三昧力，能發起先所得諸三昧。

(47) 知相三昧

「知相三昧」者，得是三昧，見一切諸三昧中有實智慧相。

(48) 如金剛三昧

「如金剛三昧」者，得是三昧，以智慧能通達一切諸法亦不見通達，用無所得故。

※因論生論：金剛三昧、金剛輪三昧、如金剛三昧，何以皆言金剛⁸⁹

問曰：三種三昧，何以皆言「金剛」？

答曰：

⁸⁴ 參見《大方等大集經》卷 28〈無盡意菩薩品〉：「何因緣故名日燈三昧？譬如日出，燈火、月光、星宿諸明悉不復現；菩薩大士得是定已，先所修智一切二乘學與無學及餘眾生所得諸智皆亦如是悉不復現，是名日燈三昧。」(大正 13, 195a14-19)

⁸⁵ 授=受【宋】【元】【明】【宮】【聖】【石】。(大正 25, 400d, n.8)

⁸⁶ 又=乃【宋】【宮】。(大正 25, 400d, n.9)

⁸⁷ 參見《思益梵天所問經》卷 3：「時普光佛為二菩薩廣說淨明三昧。所以名曰淨明三昧者，若菩薩入是三昧，即得解脫一切諸相及煩惱著，亦於一切佛法得淨光明。是故名為淨明三昧。」(大正 15, 51b8-11)

⁸⁸ 參見《大智度論》卷 25 (大正 25, 246a22-247b13)。

⁸⁹ 百八三昧中，有三種三昧含「金剛」之名：第 10 個三昧名「金剛三昧」，第 23 個三昧名「金剛輪三昧」，第 48 個三昧名「如金剛三昧」。

A、第一說

初言「金剛」，中言「金剛輪」，後言「如金剛」。

「如金剛三昧」，佛說能貫穿一切諸法，亦不見是金剛三昧能通達諸三昧。

「金剛輪三昧」者，得是三昧，即能⁹⁰持諸三昧輪。是皆佛自說義。

B、第二說

論者言：

「如金剛三昧」者，能破一切諸煩惱結使無有遺餘；譬如釋提桓因，手執金剛破阿修羅軍。即是學人末後心，從是心次第得三種菩提——聲聞菩提、辟支佛菩提、佛無上菩提。

「金剛三昧」者，能破一切諸法，入無餘涅槃，更不受有；譬如真金剛，能破諸山，令滅盡無餘。

「金剛輪」者，此三昧能破一切諸法，無遮無礙；譬如金剛輪轉時，無所(400c)不破，無所障礙。

C、第三說

復次，初、金剛，二、金剛輪，三、如金剛，名字分別，佛說其義亦異；論者釋其因緣亦異，不應致難。

(49) 心住三昧

「心住三昧」者，心相輕疾，遠逝無形，難制難持，常是動相；如獼猴子，又如掣電⁹¹，亦如蛇舌。得是三昧故，能攝令住；乃至天欲，心不動轉，何況人欲！

(50) 普明三昧

「普明三昧」者，得是三昧，於一切法見光明相，無黑闇相。如晝所見，夜亦如是；如見前，見後亦爾；如見上，見下亦爾，心中無礙。修是三昧故，得天眼通，普見光明，了了無礙。善修是神通故，得成慧眼，普照諸法，所見無礙。

(51) 安立三昧

「安立三昧」者，得是三昧者，一切諸功德善法中安立牢固；如須彌山在大海，安立不動。

(52) 寶聚三昧

「寶聚三昧」者，得是三昧，所有國土悉成七寶。

問曰：此是肉眼所見？禪定所見？

答曰：天眼、肉眼皆能見。何以故？外六塵不定故；行者常修習禪定，是故能轉本相。

(53) 妙法印三昧

⁹⁰ [即能] — 【聖】，[即] — 【宋】【元】【明】【宮】。(大正 25，400d，n.14)

⁹¹ 掣(彳ㄗ、)電：閃電。亦以形容迅疾。(《漢語大詞典(六)》，p.634)

「妙法印三昧」者，「妙法」名諸佛菩薩深功德智慧；⁹²得是三昧，得諸深妙功德智慧。

(54) 法等三昧

「法等三昧」者，「等」有二種：眾生等、法等。⁹³法等相應三昧，名為「法等」。

(55) 斷喜三昧

「斷喜三昧」者，得是三昧，觀諸法無常、苦、空、無我、不淨等，心生厭離；十想⁹⁴中，一切世間不可樂想相應三昧是⁹⁵。

(56) 到法頂三昧

「到法頂三昧」者，「法」名菩薩法，所謂六波羅蜜；到般若波羅蜜中，得方便力，到法山頂。得是三昧，能住是法山頂，諸無明煩惱不能動搖。

(57) 能散三昧

「能散三昧」者，得是三昧，能破散諸法——散空⁹⁶相應三昧是。

(58) 分別諸法句三昧

「分別諸法句三昧」者，得是三昧，能分別一切諸法語言字句，為眾生說辭無滯礙，樂說(401a)相應三昧是。⁹⁷

⁹² 妙法：佛慧。(導師《大智度論筆記》 E005] p.295)

⁹³ 參見《大智度論》卷 5 (大正 25, 97a25-b26), 卷 40 (353a18-b5)。

⁹⁴ 參見《摩訶般若波羅蜜經》卷 1:「十想：無常想、苦想、無我想、食不淨想、一切世間不可樂想、死想、不淨想、斷想、離欲想、盡想。」(大正 8, 219a11-13)

另參見《大智度論》卷 23 (大正 25, 229a2-232c15)。

⁹⁵ [是] — 【宋】【元】【明】【宮】【聖】。(大正 25, 400d, n.26)

⁹⁶ (1)《大智度論》卷 31 (1 序品):「散空者，散名別離相，如諸法和合故有：如車以輻、輞、轆、轂，眾合為車，若離散各在一處，則失車名。五眾和合因緣，故名為人，若別離五眾，人不可得。……如《經》中說：『佛告羅陀！此色眾破壞散滅，令無所有，餘眾亦如是。』是名散空。復次，譬如小兒，聚土為臺殿、城郭、閭里、宮舍，或名為米，或名為麵，愛著守護；日暮將歸，其心捨離，蹋壞散滅。凡夫人亦如是，未離欲故，於諸法中生愛著心；若得離欲，見諸法皆散壞棄捨。是名散空。復次，諸法合集故，各有名字，凡夫人隨逐名字，生顛倒染著；佛為說法，當觀其實，莫逐名字，有無皆空。如《迦旃延經》說：『觀集諦則無無見，觀滅諦則無有見。』如是種種因緣是名散空。」(大正 25, 291c21-292a28)

(2) 參見《雜阿含經》卷 6 (122 經):「時有侍者比丘，名曰羅陀。白佛言：『世尊！所謂眾生者，云何名為眾生？』佛告羅陀：『於色染著纏綿，名曰眾生；於受、想、行、識染著纏綿，名曰眾生。』佛告羅陀：『我說於色境界，當散壞消滅；於受、想、行、識境界，當散壞消滅，斷除愛欲；愛盡則苦盡，苦盡者我說作苦邊。譬如聚落中，諸小男小女嬉戲，聚土作城郭、宅舍，心愛樂著。愛未盡，欲未盡，念未盡，渴未盡，心常愛樂，守護言：我城郭，我舍宅。若於彼土聚，愛盡，欲盡，念盡，渴盡，則以手撥足蹴，令其消散。如是羅陀！於色散壞消滅，愛盡，愛盡故苦盡，苦盡故我說作苦邊。』」(大正 2, 40a4-17)

(3) 參見《雜阿含經》卷 10 (262 經):「如實正觀世間集者，則不生世間無見；如實正觀世間滅，則不生世間有見。」(大正 2, 67a2-4)

⁹⁷ 《大智度論》卷 25:「四無礙智者：義無礙智、法無礙智、辭無礙智、樂說無礙智。……是名字及義，云何令眾生得解？當以言辭分別莊嚴，能令人解，通達無滯，是名辭無礙智。說有

(59) 字等相三昧

「字等相三昧」者，得是三昧，觀諸字諸語皆悉平等；呵訾⁹⁸、讚歎，無有憎愛。

(60) 離字三昧

「離字三昧」者，得是三昧，不見字在義中，亦不見義⁹⁹在字中。

(61) 斷緣三昧

「斷緣三昧」者，得是三昧，若內若外，樂中不生喜，苦中不生瞋，不苦不樂中不生¹⁰⁰捨心——於此三受遠離不著，心則歸滅；心若滅，緣亦斷。

(62) 不壞三昧

「不壞三昧」者，緣法性畢竟空相應三昧，戲論不能破，無常不能轉，先已壞故。

(63) 無種相三昧

「無種¹⁰¹三昧」者，得是三昧，不見諸法種種相，但見一相——所謂無相。

(64) 無處行三昧

「無處行三昧」者，得是三昧，知三毒火然三界故，心不依止；涅槃畢竟空故，亦不依止。

(65) 離矇昧三昧

「離矇昧¹⁰²三昧」者，得是三昧，於諸三昧中，微翳¹⁰³無明等悉皆除盡。

(66) 無去三昧

「無去三昧」者，得是三昧，不見一切法來去相。

(67) 不變異三昧

「不變異三昧」者，¹⁰⁴得是三昧，觀一切諸法，因不變爲果，如乳不變作酪；諸法皆住自相，不動故。

(68) 度緣三昧

「度緣三昧」者，得是三昧，於六塵中諸煩惱盡滅，度六塵大海，亦能過一切三昧緣生智慧。

(69) 集諸功德三昧

「集諸功德三昧」者，得是三昧，集諸功德，從信至智慧，初夜、後夜修習不息；如日月運轉，初不休息。

(70) 住無心三昧

道理，開演無盡，亦於諸禪定中得自在無滯，是名樂說無礙智。」(大正 25, 246a22-b13)

⁹⁸ 訾=罵【宋】【元】【明】【宮】。(大正 25, 401d, n.1)

⁹⁹ 義=字【宋】【元】【明】【宮】【聖】。(大正 25, 401d, n.2)

¹⁰⁰ 生+(不知)【宋】【元】【明】【宮】【聖】。(大正 25, 401d, n.3)

¹⁰¹ 種+(相)【元】【明】【石】。(大正 25, 401d, n.5)

¹⁰² 矇昧：昏暗模糊。(《漢語大詞典(五)》，p.839)

¹⁰³ 翳(一、丿)：1、遮蔽，隱藏，隱沒。2、目疾引起的障膜。(《漢語大詞典(九)》，p.676)

¹⁰⁴ 法法住自相：因不變果。(導師《大智度論筆記》 E005 } p.295)

「住無心三昧」者，入是三昧中，不隨心，但隨智慧，至諸法實相中住。

(71) 淨妙華三昧

「淨妙華三昧」者，如樹華敷¹⁰⁵開，令樹嚴飾¹⁰⁶；得是三昧，諸三昧中，開諸功德華以自莊嚴。

(72) 覺意三昧

「覺意三昧」者，得是三昧，令諸三昧變成無漏，與七覺相應；譬如石汁¹⁰⁷一斤，能變千斤銅為金。

(73) 無量辯三昧

「無量辯三昧」者，即是樂說辯。得是三昧力故，乃至樂說一句，無量劫而不窮盡。

(74) 無等等三昧

「無等等三昧」者，(401b)得是三昧，觀一切眾生皆如佛，觀一切法皆同佛法——無等等般若波羅蜜相應是。

(75) 度諸法三昧

「度諸法三昧」者，得是三昧，入三解脫門，過出三界，度三乘眾生。

(76) 分別諸法三昧

「分別諸法三昧」者，即是分別慧相應三昧。得是三昧，分別諸法善、不善，有漏、無漏，有為、無為等相。

(77) 散疑三昧

「散疑三昧」者，有人言：即是見諦道中無相三昧；疑結，見諦智相應三昧斷故。有人言：菩薩無生法忍相應三昧是¹⁰⁸。時，一切法中疑網悉斷，見十方諸佛，得一切諸法實相。

有人言：無礙解脫相應三昧是。諸佛得是三昧已，於諸法中無疑¹⁰⁹，無近、無遠，皆如觀掌中¹¹⁰。

(78) 無住處三昧

¹⁰⁵ (1) 敷(ㄉㄨ)：生長，開放。《書·禹貢》：“篠簜既敷，厥草惟夭，厥木惟喬。”孔傳：“篠，竹箭；簜，大竹，水去已布生。”顏師古注：“夭，盛貌也。”孔傳：“喬，高也。”(《漢語大字典(二)》，p.1473)

(2) 敷英：開放的花朵。《藝文類聚》卷八一引晉傅咸《芸香賦》：“攜昵友以消遙兮，覽偉草之敷英。”(《漢語大詞典(五)》，p.504)

¹⁰⁶ 嚴飾：裝飾美盛，盛飾。(《漢語大詞典(三)》，p.550)

¹⁰⁷ 參見《大智度論》卷28〈1序品〉：「以一切法各各無定相故，可轉地或作水相；如酥、膠、蠟是地類，得火則消，為水則成濕相，水得寒則結成冰而為堅相。石汁作金，金敗為銅，或還為石。眾生亦如是，惡可為善，善可為惡。」(大正25，264c10-15)

¹⁰⁸ 是+ (是)【元】【明】【聖】【石】。(大正25，401d，n.6)

¹⁰⁹ 疑=礙【宋】【元】【明】【宮】。(大正25，401d，n.8)

¹¹⁰ [中] - 【宋】【元】【明】【宮】【聖】。(大正25，401d，n.9)

「無住處三昧」者，即是無受智慧相應三昧。得是三昧，不見一切諸法定有住處。

(79) 一莊嚴三昧

「一莊嚴三昧」者，得是三昧，觀諸法皆一；或一切法有相故一，或一切法無故一，或一切法空故一——如是等無量皆一。以一相智慧莊嚴是三昧，故言「一莊嚴」。

(80) 生行三昧

「生行三昧」者，「行」名觀。得是三昧，能觀種種行相——入相、住相、出相；又是行皆空，亦不可見。

(81) 一行三昧

「一行三昧」者，是三昧常一行畢竟空相應三昧中，更無餘行次第——如無常行中次有苦行，苦行中次有無我行。

又菩薩於是三昧不見此岸、不見彼岸——諸三昧入相爲此岸，出相爲彼岸；初得相爲此岸，滅相爲彼岸。

(82) 不一行三昧

「不一行三昧」者，與上一行相違者是——所謂諸餘觀行。

(83) 妙行三昧

「妙行三昧」者，即是畢竟空相應三昧，乃至不見不二相，一切戲論不能破。

(84) 達一切有底散三昧

「達一切有底散三昧」者，「有」名三有；¹¹¹「底」者，非有想非無想，以難到故名「底」；「達」者，以無(401c)漏智慧，乃至離非有想非無想，入無餘涅槃，三界五眾散滅。

復次，菩薩得是不生不滅智慧，一切諸有通達散壞，皆無所有。

(85) 入名語三昧

「入名語三昧」者，得是三昧，識一切眾生、一切物、一切法名字，亦能以此名字語化人；一切語言，無不解了，皆有次第。

(86) 離音聲字語三昧

「離音聲字語三昧」者，得是三昧，觀一切諸法皆無音聲語言，常寂滅相。

(87) 然炬三昧

「然炬三昧」者，如捉炬夜行，不墮險處；菩薩得是三昧，以智慧炬，於諸法中無錯、無著。

(88) 淨相三昧

「淨相三昧」者，得是三昧，能清淨具足莊嚴三十二相，又能如法觀諸法總相、

¹¹¹ 《大智度論》卷 83：「有名三有：欲有、色有、無色有。」(大正 25, 644b26-27)

別相，¹¹²亦能觀諸法無相清淨——所謂空、無相、無作，如〈相品〉¹¹³是¹¹⁴中廣說。

(89) 破相三昧

「破相三昧」者，得是三昧，不見一切法相，何況諸三昧相！即¹¹⁵是無相三昧。

(90) 一切種妙足三昧

「一切種妙足三昧」者，得是三昧，以諸功德具足莊嚴——所謂好姓、好家、好身、好眷屬、禪定、智慧，皆悉具足清淨。

(91) 不喜苦樂三昧

「不喜苦樂三昧」者，得是三昧，觀世間樂多過多患、虛妄顛倒、非可愛樂；觀世間苦如病、如箭入身，心不喜樂。以一切法虛誑故，不求其樂。何以故？異時變為苦；樂尚不喜，何況於苦！

(92) 無盡相三昧

「無盡相三昧」者，得是三昧，觀一切法無壞無盡。

問曰：若爾者，云何不墮常邊？

答曰：如菩薩雖觀無常，不墮滅中；若觀不盡，不墮常中。此二相於諸法中皆不可得，¹¹⁶有因緣故修行，所謂為罪福不失故言常，離著故言無常。

(93) 陀羅尼三昧

「陀羅尼三昧」者，得是三昧力故，聞持等諸陀羅尼皆自然得。

(94) 攝諸邪正相三昧

「攝諸邪正相三昧」者，得是三昧，不見三聚眾生——所(402a)謂正定、邪定、不定，¹¹⁷都無所棄，一心攝取；又於諸法不見定正相、定邪相，諸法無定相故。

(95) 滅憎愛三昧

¹¹² (1) 參見《大智度論》卷 31：「問曰：何等是總相？何等是別相？答曰：總相者，如無常等；別相者，諸法雖皆無常，而各有別相；如地為堅相，火為熱相。」(大正 25, 293a26-29)

(2) 參見《大智度論》卷 31：「復次，一切諸法性有二種：一者、總性，二者、別性。總性者，無常、苦、空、無我、無生無滅、無來無去、無入無出等。別性者，如火熱性，水濕性，心為識性。如人喜作諸惡，故名為惡性；好集善事，故名為善性。」(大正 25, 293a25-c10)

¹¹³ 《正觀》第 6 期，p.128，另參見 p.274，n.124：

(1) 如法觀諸法總相、別相，參見《摩訶般若波羅蜜經》卷 3〈相行品〉(大正 8, 237b11-28)，《放光般若經》卷 3〈空行品〉(大正 8, 16a11-20)，《光讚經》卷 4〈行品〉(大正 8, 171c12-172a12)。

(2) 觀諸法無相清淨，參見《摩訶般若波羅蜜經》卷 14〈問相品〉(大正 8, 325b17-28)，《放光般若經》卷 11〈問相品〉(大正 8, 77b14-21)。

¹¹⁴ [是] — 【宋】【元】【明】【宮】【石】。(大正 25, 401d, n.17)

¹¹⁵ 《大正藏》原作「得」，今依《高麗藏》作「即」(第 14 冊，858a8)。

¹¹⁶ 理則雙非，方便雙用：用常無常。(導師《大智度論筆記》 E006] p.296)

¹¹⁷ 眾生有三分：正定——必入涅槃，邪定——必入惡道，不定。

(導師《大智度論筆記》 B010] p.124)

「滅憎愛三昧」者，得是三昧，可喜法中不生愛，可憎¹¹⁸法中不生瞋。

(96) 逆順三昧

「逆順三昧」者，得是三昧，於諸法中逆順自在；能破諸邪逆眾生，能順可化眾生。又離著故，破一切法；善根增長故，成一切法；亦不見諸法逆順，是事亦不見，以無所有故。

(97) 淨光三昧

「淨光三昧」者，得是三昧，一切法中諸煩惱垢不可得；不可得故，諸三昧皆清淨。

(98) 堅固三昧

「堅固三昧」者，
有人言：金剛三昧是，堅固不壞故。

有人言：金剛非。所以者何？金剛亦易破故。¹¹⁹是諸法實相智相應三昧不可破，如虛空，以是故言牢固。¹²⁰

(99) 滿月淨光三昧

「滿月淨光三昧」者，得是三昧，所言清淨，無諸錯謬。如秋時，虛空清淨，月滿、光明、涼樂¹²¹、可樂，無諸可惡；菩薩亦如是，修諸功德故，如月滿；破無明闇¹²²故，淨智光明具足；滅愛恚等火故，清涼¹²³功德具足；大利益眾生故，可樂。

(100) 大莊嚴三昧

「大莊嚴三昧」者，見十方如恒河沙等世界，以七寶華香莊嚴，佛處其中——如是等清淨莊嚴。得是三昧故，一時莊嚴諸功德；又觀此莊嚴空無所有，心無所著。

(101) 能照一切世間三昧

「能照一切世間¹²⁴三昧」者，得是三昧故，能照三種世間——眾生世間、住處世間、五眾世間。¹²⁵

(102) 三昧等三昧

¹¹⁸ 憎=惡【宋】【元】【明】【宮】【聖】。(大正 25, 402d, n.1)

¹¹⁹ 金剛可破。(導師《大智度論筆記》E006] p.296)

¹²⁰ 參見《大智度論》卷 97:「隨一切堅固三昧者，諸法實相名堅固；得是三昧者，隨諸法實相，不隨餘法。」(大正 25, 737b13-15)

¹²¹ 樂=爽【明】。(大正 25, 402d, n.4)

¹²² 闇=黑【宋】【元】【明】【宮】【聖】。(大正 25, 402d, n.5)

¹²³ 明註曰「涼」，南藏作「淨」。(大正 25, 402d, n.6)

¹²⁴ [間]—【宋】【元】【明】【宮】【聖】。(大正 25, 402d, n.7)

¹²⁵ (1)《大智度論》卷 70:「世間有三種：一者、五眾世間，二者、眾生世間，三者、國土世間。」(大正 25, 546b29-c2)

(2) 三種世間：眾生世間，住處世間(國土世間)，五眾世間。
(導師《大智度論筆記》B010] p.132)

「三昧等三昧」者，得是三昧，觀諸三昧皆一等——所謂攝心相。是三昧皆得¹²⁶因緣生，有爲作法，無深淺；得是三昧，皆悉平等，是名爲「等」。與餘法亦等無異，以是故義中說，一切法中定亂相不可得。

(103) 攝一切有諍無諍三昧

「攝一切有諍無諍三昧」者，得是三昧，不(402b)見是法如是相、是法不如是相；不分別諸法有諍無諍，於一切法中通達無礙。於眾生中亦無好醜諍論，但隨眾生心行而度脫之。得是三昧故，於諸三昧皆隨順不逆。

(104) 不樂一切住處三昧

「不樂一切住處三昧」者，得是三昧，不樂住世間，不樂住非世間。¹²⁷以世間無常過故不樂；非世間中無一切法，是大可畏處，不應生樂。

(105) 如住定三昧

「如住定三昧」者，得是三昧故，知一切法如實相，不見有法過是如者。

「如」義，如先說。¹²⁸

(106) 壞身衰三昧

「壞身衰三昧」者，血、肉、筋、骨等和合故名爲「身」。是身多患，常與¹²⁹飢、寒、冷、熱等諍，是名「身衰」。得是三昧故，以智慧力，分分破壞身衰相，乃至不見不可得相。

(107) 壞語如虛空三昧

「壞語如虛空三昧」者，「語」名，內有風發，觸七處故有聲，依聲故有語。¹³⁰觀如是語言因緣故，能壞語言，不生我相及以愛憎。

有人言：二禪無覺觀；¹³¹是壞語三昧，賢聖默然故。

有人言：無色定三昧；彼中無身，離一切色故。

¹²⁶ 得=從【宋】【元】【明】【宮】【聖】【石】。(大正 25, 402d, n.8)

¹²⁷ (1)《大方廣佛華嚴經》卷 19：「云何爲世間？云何非世間？世間、非世間，但是名差別；三世、五蘊法，說名爲世間；彼滅，非世間，如是但假名。」(大正 10, 101c4-7)

(2) 唐·湛然述《止觀輔行傳弘決》卷 5：「世間有三種，亦如前列。非世間者：無一切法大畏處；且指有漏名爲世間，二乘所依名非世間，故云可畏。」(大正 46, 293c20-23)

¹²⁸ 《正觀》第 6 期，p.128：參見《大智度論》卷 32 (大正 25, 297b24-c5, 298b9-c27)。

¹²⁹ [與]—【宋】【元】【明】【宮】。(大正 25, 402d, n.11)

¹³⁰ (1)《大智度論》卷 6：「如人欲語時，口中風名憂陀那，還入至臍，觸臍響出，響出時觸七處退，是名語言。如偈說：風名憂檀那，觸臍而上去；是風七處觸，項及齦、齒、脣、舌、咽及以胸，是中語言生。」(大正 25, 103a15-20)

(2) 七處：1、項，2、斷，3、齒，4、脣，5、舌，6、咽，7、胸。

(3)「響出時觸七處退」：聲響出時，風接觸七種發聲部位之後而出體外。(參見梶山雄一·赤松明彥譯《大乘佛典·中國·日本篇(一)》p.132-p.133)

(4) 項：頸的後部，亦泛指頸。(《漢語大詞典(十二)》，p.229)

(5) 斷(一ノノ)：同「齦」，牙床。《急就篇》卷三：「鼻口脣舌斷牙齒。」顏師古注：「斷，齒根肉也。」(《漢語大詞典(十二)》，p.1455)

¹³¹《大智度論》卷 20：「滅覺、觀，攝心深入，內清淨，得微妙喜，入第二禪。」(大正 25, 208b22-23)。

有人言：但是諸菩薩三昧，能破先世結業因緣不淨身而受法身，隨可度眾生種種現形。

(108) 離著虛空不染三昧

「離著虛空不染三昧」者，菩薩行般若波羅蜜，觀諸法畢竟空、不生不滅，如虛空，無物可喻。

鈍根菩薩著此虛空；得此三昧故，離著虛空等諸法，亦不染著是三昧。

如人沒在泥中，有人挽出，鎖腳爲奴；如¹³²有三昧能離著虛空，而復著此三昧亦如是。今是三昧能離著虛空，亦自離著。

2、釋疑：佛多說「諸三昧」，論以「諸法」釋之理

問曰：佛多說「諸三昧」，汝何以但說「諸法」？¹³³

答曰：佛多說果報，論者合因緣果報說。譬如人觀身不(402c)淨，得不淨三昧；身是因緣，三昧是果。又如人觀五眾無常、苦、空等，得七覺意三昧，能生八聖道、四沙門果。

復次，佛應適眾生故，但說一法；論者廣說，分別諸事。譬如一切有漏皆是苦因，而佛但說「愛」；一切煩惱滅名滅諦，佛但說「愛盡」。

是菩薩於諸觀行中必不疑，於諸三昧未了故，佛但說「三昧」；論者說「諸法」，一切三昧皆已在中。

3、釋「用無所得故」

是諸三昧未後，皆應言「用無所得」，以同般若故。

4、結

如是等無量無邊三昧和合，名爲「摩訶衍」。

¹³² [如] — 【宋】【元】【明】【宮】【聖】。(大正 25, 402d, n.15)

¹³³ 此卷的百八三昧中，關於「佛多說諸三昧，論者但說諸法」之說法，如第 2、4、5、10、15、16、17、18、21、23、26、27、30、31、32、35、37、39、40、41、42、43、44、48、50、51、53、55、57、58、64、66、67、74、75、76、79、85、86、88、89、91、92、94、95、96、97、102、103、105、108 等三昧的內容所說。